

Bilsena Šahman
Sarajevo, 07.09.2021.godine

Kanton Sarajevo
Vlada Kantona Sarajevo
Ministarstvo komunalne privrede, infrastrukture, prostornog uređenja,
građenja i zaštite okoliša
n/r Predsjedavajući Skupštine Kantona Sarajevo
n/r Sekretar Skupštine Kantona Sarajevo

Predmet: Zastupnička inicijativa za rješavanje problema nedostatka grobnih mjesta

Poštovani,

U skladu sa članom 106. Poslovnika Skupštine Kantona Sarajevo („Službene novine Kantona Sarajevo“, broj 25/10, 14/11, 19/11, 7/12, 26/12), upućujem zastupničku inicijativu **da Vlada Kantona Sarajevo u skladu sa svojim ingerencijama, poduzme sve potrebne korake i pokrene aktivnosti rješavanja imovinsko pravnih odnosa na području obuhvata gradskog groblja Vlakovo, konkretno, na dijelu zemljišta koje koristi UPI Zemljoradnička zadruga „Ilidža“.**

Obrazloženje

Pitanje ukopa i nedostatka dovoljnog broja grobnih mjesta na području Kantona Sarajevo je problem koji se vrlo često aktuelizira, ali nikako u potpunosti, ne rješava. Cijeneći da je u Kantonu Sarajevo jedino aktivno komunalno groblje na kojem se vrše redovni ukopi gradsko groblje Vlakovo, **te da je trenutni kapacitet slobodnih grobnih mjesta za ukop skoro popunjen, nalaže se Vladi Kantona Sarajevo da se u okviru svojih nadležnosti obrati Vladi Federacije BiH, po pitanju rješavanja imovinsko - pravnih odnosa na toj lokaciji.** Naime, korisnik zemljišta koje graniči sa gradskim grobljem Vlakovo je UPI Zemljoradnička zadruga „Ilidža“, radi se o državnom zemljištu, čiji je stvarni vlasnik FBiH, prenošenjem prava vlasništva na Kanton Sarajevo, **obezbijedio bi se dovoljan broj grobnih mjesta za narednih 50 godina.** Poučeni iskustvom pandemije, te njenih nesagledivih posljedica, pokazalo se da dosadašnja praksa kupovine zemljišta po potrebi, nije rješenje. Mora Vam biti jasno da, nakon što se definiše parcela predviđena za kreiranje novih grobnih mjesta i navedena parcela bude spremna za ukop, potrebno je uraditi niz aktivnosti koje podrazumijevaju radove izvođenja oborinskog kanalizacionog sistema, drenažnog sistema, vodovodnih instalacija, postavljanje vanjske rasvjete sa pripadajućim elektroinstalacijama, uvezivanje sa postojećim putevima, stazama i saobraćajnicama, te hortikulturno uređenje na proširenim grobljanskim poljima.

Sve navedeno iziskuje određeno vrijeme, posebno imajući u vidu da je nakon rješavanja imovinsko – pravnih odnosa, te obezbjeđivanja dovoljnog broja grobnih mjesta, potrebno provesti procedure javnih nabavki u skladu sa Zakonom o javnim nabavkama, koji predviđa i žalbu od strane ponuđača, što bi u konačnici moglo rezultirati odugovlačenjem realizacije projekta, te nam i ta činjenica daje dodatnu težinu i motiv da je potrebno u što kraćem vremenskom roku pristupiti realizaciji ovog projekta.

Smatram da se rješavanju ovog problema treba pristupiti prioritetno, jer bi posljedice njegovog ignorisanja i indolencije prema istom mogle dovesti do ugrožavanja normalnog funkcionisanja života u Kantonu Sarajevo.

S poštovanjem,

Bilsena Šahman

